

永濟縣志

第四冊

補修永濟縣志分目

人物上

永濟縣志

卷七

分目

一

永濟縣志卷之七

按史舜帝名姚姓顓頊七世孫顓頊生窮蟬窮蟬生敬康  
敬康生勾芒勾芒生嶠牛嶠牛生瞽瞍瞽瞍生舜母蚤  
世瞽再娶生弟象父頑母嚚象傲克諧以孝烝烝乂不  
格姦微時耕厯山人皆讓畔漁雷澤人皆讓居陶河濱  
器不苦窳作什器於壽邱就販負夏古志載虞帝遺蹟甚詳其歌薰有臺  
釐降有泉旁出有井以至曰耕曰漁曰陶莫不各有其地而齊省浙東爭相援引蓋以孟子有東西之語也不  
知此乃對文王而言猶云東方西方耳故曰地之相去千有餘里正以蒲阪岐周言也明者自能辨之所  
居一年成聚二年成邑三年成都二十以孝聞三十膺

永濟縣志

卷七

人物上

四岳之薦妻帝二女厯官司徒百揆四岳共三載乃於  
丙辰正月元日行居攝事又二十八載癸未帝堯崩乙  
酉喪畢避位南河之南明年丙戌卽帝位號有虞定都  
於虞今蒲州以唐都封堯子朱三十三年丁巳命禹總師  
又十七年癸西南巡崩於蒼梧之野壽一百一十歲葬  
九嶷是爲零陵後禹卽位封子均於虞今有緡餘姚上虞餘西西虞無  
錫巴陵長沙衡山虞城濮陽媯州皆其庶子七人之裔所散處之地均之孫曰思當寒浞  
夏時妻少康以二姚而邑諸綸卽今榮河縣有田一成有眾  
一旅祀夏配天不失舊物皆思之力商封帝後於遂周

封於陳虞闕父者爲周陶正武王與其神明之後以元  
女大姬妻其子滿是爲胡公而封之都宛邱賜姓媯與杞宋共  
爲三恪齊桓公時陳公子完奔齊後遂有齊是爲田齊  
秦始皇二十六年齊亡國絕楚漢時田榮等倡兵據齊  
地及高帝混一慮諸田不靖因遷關內自是代更流播  
靡一然裔實未泯嗟乎帝舜聖德神功同流天地而派  
系縣長厥後益眾探本窮源實蒲之出類拔萃者也

人物

周

段干木魏人爲文侯師文侯過其閭必式故里在上方祀

鄉賢

漢

姚平河東人受焦壽易學於京房後爲郎博士繇是易有

京氏之學祀鄉賢

胡建字子孟河東人也孝武天漢中守軍正丞貧無車馬

常步與走卒起居所以尉薦走卒甚得其心時監軍御

永濟縣志

卷七

人物上

三

史爲姦穿北軍壘垣以爲賈區建欲誅之乃約其走卒

曰我欲與公有所誅吾言取之則取斬之則斬於是當

選士馬日監御史與護軍諸校列坐堂皇上建從走卒

趨至堂皇下拜謁因上堂皇走卒皆上建指監御史曰

取彼走卒前曳下堂皇建曰斬之遂斬御史護軍諸校

皆愕驚不知所以建亦已有成奏在其懷中遂上奏曰

臣聞軍法立武以威眾誅惡以禁邪今監御史公穿軍

垣以求賈利私買賣以與士市不立剛毅之心勇猛之

節亡以帥先士大夫尤失理不公用文史議不至重法

黃帝李法曰壁壘已定穿窬不繇路是謂姦人姦人者  
殺臣謹案軍法曰正亡屬將軍將軍有罪已聞二千石  
以下行法焉丞於用法疑執事不諉上臣謹以斬昧死  
以聞制曰司馬法曰國容不入軍軍容不入國何文吏  
也三王或誓於軍中欲民先成其慮也或誓於軍門之  
外欲民先意以待事也或將交刃而誓致民志也建又  
何疑焉建繇是顯名後爲渭城令治甚有聲值昭帝幼  
皇后父上官將軍安與帝姊蓋主私夫丁外人相善外  
人驕恣怨故京兆尹樊福使客射殺之客藏公主廬吏

不敢捕渭城令建將吏卒圍捕蓋主聞之與外人上官  
將軍多從奴客往犇射追吏吏散走主使僕射劾渭城  
令游徼傷主家奴建報無它坐蓋主怒使人上書告建  
侵辱長公主射甲舍門知吏賊傷奴辟報故不窮審大  
將軍霍光寢其奏後光病上官氏代聽事下吏捕建建  
自殺吏民稱冤至命渭城立其祠

舊志論曰前世諸史有稱人而但舉其郡者有舉其郡  
而兼及其縣者如尹翁歸河東平陽人此兼郡縣言之  
者也若胡建則惟以郡言之者也漢地理志河東郡聞

喜平陽皆在其後而先列蒲阪大陽則知諸傳但言河東者大抵蓋皆爲蒲阪人也州舊志首引暴勝之平陽志山西通志因之夫漢書無勝之傳特附見雋不疑傳中史亦未曾言勝之爲河東人且漢無河中之名而強以河中人書之豈爲允乎

義縱河東人武帝時以中郎補上黨郡中令舉第一遷爲長陵及長安令直法行治不避貴戚上以爲能遷河內都尉道不拾遺又累遷爲右內史上幸甘泉以道不治銜之祀鄉賢

永濟縣志

卷七

人物上

五

晉

張華字茂先其裔爲蒲阪人累遷司空博物洽聞世無與比祀鄉賢

北魏

敬珍蒲阪人東魏丞相高歡西伐珍謂兄祥曰高歡迫逐乘輿天下忠義之士皆欲剗刃於其腹今又稱兵西上吾欲與兄起兵斷其歸路此千載一時也祥從之糾合鄉里有眾萬餘會歡自沙苑敗歸祥珍帥眾邀之斬獲甚眾魏賀拔勝李弼至河東祥珍率猗氏等六縣十餘

萬戶歸之丞相宇文泰以珍爲平陽太守祥爲行臺郎  
中祀鄉賢

隋

陳孝意河東人大業初爲魯郡司法書佐號廉平太守蘇  
威嘗欲殺一囚固諫不許因解衣請先受死良久威意  
解謝而遣之漸加禮敬及威爲納言奏孝意侍御史父  
憂去居喪過禮有白鹿馴擾其廬時以爲孝感尋起授  
雁門郡丞菜食齋居朝夕哀臨每一發聲未嘗不絕倒  
柴毀骨立見者哀之孝意莅官清節彌厲發奸摘伏動

永濟縣志

卷七

人物上

六

若有神吏人稱之馬邑劉武周殺太守王仁恭前郡丞  
楊長仁雁門令王確等謀應賊孝意族其家郡中戰慄  
俄而武周來攻孝意拒之每致克捷而孤城無援誓以  
必死每旦夕向詔敕庫俯伏流涕悲動左右糧盡爲校  
尉張世倫所殺

趙綽河東人性質直剛毅周初爲天官府史以恭謹恪勤  
擢授夏官府下士稍以明幹見知父艱哀毀骨立時稱  
其孝累轉中士高祖爲丞相知其清正引爲錄事參軍  
尋歷大夫從擊叛蠻以功拜儀同賜物千段隋初授大

理丞處法平允考績連最轉大理正尋遷尚書都官侍郎轉刑部侍郎治梁士彥等獄賜物三百段奴婢十口馬二十匹每有奏讞正色侃然上嘉之漸見親重時議重治盜法綽諫曰陛下行堯舜之道多存寬宥況律者天下之大信其可失乎納之遷大理少卿蕭摩訶子世略作亂摩訶當從坐上赦之綽固諫不可上不能奪命綽退食綽曰臣奏獄未決不敢退朝上曰大理其爲朕特赦摩訶也因命左右釋之刑部侍郎辛亶以衣緋褱議辟綽曰據法不當死臣不敢奉詔上曰卿惜辛亶而

不自惜也命執綽綽曰陛下甯可殺臣不得殺辛亶至朝堂上使人曰竟何如對曰執法一心不敢惜死乃釋亶明日謝綽勞勉之賜物三百段二人在市以惡錢易好者議辟綽諫曰此人坐當杖殺之非法上曰不關卿事綽曰陛下不以臣愚暗置在法司豈得不關臣事上曰撼大木不動者當退對曰臣望感天心何論動木上復曰啜羹者熱則置之綽拜益前訶之不肯退上遂入治書侍御史柳彧復上奏切諫上乃止上以綽誠直每引入閣中卽呼坐評論得失前後賞賜萬計後進開府

贈其父爲蔡州刺史時與大理卿薛胄俱名平恕仁壽中卒年六十三上爲之流涕中使弔祭鴻臚監護喪事二子元方元襲

敬肅字敬儉河東蒲阪人少以貞介知名釋褐州主簿開皇初爲安陵令有能名擢拜秦州司馬轉幽州長史仁壽中爲衛州司馬俱有異績大業初遷潁川郡贊務五年朝東都司隸大夫薛道衡稱肅曰心如鐵石老而彌篤左翊衛大將軍宇文述在潁川每有書屬肅未嘗開封輒令使者持去述賓客放縱以法繩之八年朝於涿

永濟縣志

卷七

人物上

八

郡上將擢太守輒爲述所毀不行大業末乞歸優詔許之去官日家無餘財歲餘終

張文詡河東人父琚開皇中爲洹水令以清正聞有書數千卷子姪皆以明經自達文詡博覽文籍通習羣經特精三禮每好鄭康成注解諸儒異說亦皆詳究游太學博士房暉遠等莫不推伏門生多請質疑滯博引證據辯說無窮治書侍御史皇甫誕恆執弟子禮以所乘馬邀屈文詡每牽馬步進意在不因人自致也右僕射蘇威與語大悅勸令從官固辭仁壽末策杖歸灌園爲業

州郡頻舉皆不應事母以孝聞嘗有人夜刈其麥見而避之盜棄麥謝文詡慰諭誓不言固令持去經數年盜者乃向鄉人說之鄰家築牆心有不直因毀舊堵以應之醫腰疾不效而體被傷因爲隱曰吾昨風眩落坑所致其掩人短皆此類州縣將加賑恤輒辭不受嘗從容歎曰老冉冉而將至恐修名之不立以如意擊几自樂皆有處所時人方之閔子騫原憲焉終於家鄉人爲立碑頌號曰張先生

唐

永濟縣志

卷七

人物上

九

敬播蒲州河東人貞觀初擢進士第時顏師古孔穎達撰次隋史詔播詣祕書內省參纂再遷著作佐郎兼修國史從伐高麗上名山爲駐蹕播謂人曰山所以名天意也其後果然遷太子司議郎又與令狐德棻等撰晉書大抵凡例皆播所發也更議法律播曰兄弟雖孔懷之重然比於父子則輕故生有異室死有別宗今高官重爵本蔭惟逮子孫而不及昆季烏得榮隔其蔭而罪均其罰詔從其議永徽後歷諫議大夫給事中始播與許敬宗撰高祖實錄興創業盡貞觀十四年至是又撰太

宗實錄訖二十三年坐事出爲越州長史徙安州卒房元齡嘗稱播陳壽之流乎元齡患顏師古注漢書文繁令掇其要爲四十篇

羅道宗字允之河中人慷慨尙義貞觀末謫嶺南有友人同斥者死於荆襄間臨終泣曰人生有死獨委瑩異壤耶道宗握手曰吾若還終不使君獨畱此後果舁櫬葬於其家仕至大學博士爲時名儒祀鄉賢

柳範河中人太宗朝爲監察御史以直諫稱祀鄉賢

柳澤字夷曠範之從孫鯁介寡言笑風度方嚴景雲中爲

永濟縣志

卷七

人物上

十

鎧曹參軍太平公主奏復斜封澤詣闕上疏不報後復上書睿宗善之拜監察御史開元中轉殿中侍御史言吐蕃難以信結果劫盟帝益禮異之周慶立造奇器以進澤諫之元宗稱善祀鄉賢

呂諲河中河東人少力於學志行整飭孤貧不自業里人程氏以女妻諲厚分貲贍濟故稱譽日廣開元末第進士調甯陵尉採訪使韋陟署支使哥舒翰節度河西表度支判官歷太子通事舍人秉性靜慎勤總吏職諸僚或出游諲獨頽然據案鉤視簿最翰益親之累兼殿中

侍御史西趨靈武拜御史中丞陳事無不順納遷武部  
侍郎與李峴同領三司使諲援律傳經過峴當時憚其  
持法乾元二年擢同中書門下平章事知門下省會喪  
解三月復召知門下省事兼判度支還知政累封須昌  
縣伯遷黃門侍郎上元初加同中書門下三品罷爲太  
子賓客數月拜荊州長史灃朗峽忠等五州節度使請  
荊州置南部詔可於是更號江陵府以諲爲尹置永平  
軍萬人遏吳蜀之衝以湖南之岳潭郴道邵連黔中之  
涪凡七州隸其道初衡州蠻陳希昂爲長史張惟一司

馬督家兵千人脇殺親將牟遂金後過江陵入謁諲伏  
甲擊殺之誅黨偶數十人積尸府門內外震服諲爲治  
不急細務決大事剛果不撓始在河西悉知諸將能否  
及爲尹奏取材者數十人總牙兵故威惠兩行李揆妄  
奏置軍湖南非便又陰遣人刺過失諲訟其事上逐揆  
出之諲羸疾卒年五十一贈吏部尚書諲在朝不稱任  
職相及爲荊州號令嚴明賦斂均一治尚威信軍士用  
命闔境無盜賊民歌咏之自至德以來處方面數十人  
諲最有名荆人生構祠及沒吏哀錢十萬徙祠府西始

薦杜鴻漸元載才後皆爲宰相永泰中嚴郢以故吏請  
諡博士獨孤及諡曰肅郢請益曰忠肅及執奏諡遂不  
改

唐之河東與漢不同漢河東郡所統頗廣若唐以河中  
府爲河東郡且有河東縣其河東縣則今永樂以北兼  
有臨晉西境地故凡唐史所稱河中河東人如呂諲裴  
冕等大抵皆爲今永濟人矣呂化光亦河東人柳宗元  
誄之又稱東平豈呂氏先出東平而後居河東者乎則  
諲之望宜亦爲東平明矣

裴冕字章甫河東人少有學術以廕調渭南尉採訪使王  
鉷表署判官歷殿中侍御史明銳剛果號爲稱職詔廷  
辨鉷獄冕抗言其誣由是知名元宗入蜀拜御史中丞  
兼左庶子以副太子從肅宗至靈武與杜鴻漸等同勸  
進以功拜中書侍郎同平章事尋加尙書右僕射封冀  
國公祀鄉賢

柳芳字仲敷蒲州人由永甯尉入直史館肅宗時與常述  
綴緝吳兢所次國史凡百五十篇又倣編年法爲唐歷  
四十篇時稱其得史體歷官集賢殿學士卒祀鄉賢

薛珏字溫如河中人初廕補乾甯令以清白聞課第一改昭德人請立石紀德遷楚州刺史德宗命使者分諸道黜陟李丞狀其簡趙贊言其廉盧翰稱其肅交薦於朝拜中散大夫賜金紫入爲司農卿祀鄉賢

呂渭河中人節度大使延之之子爲中書舍人湖南刺史領七郡建中末擢禮部侍郎時中書省有古柳枯死德宗自梁州還枯柳復榮人以爲瑞柳渭令貢土賦之

呂溫河中人侍郎渭子也從陸質治春秋梁肅爲文章貞元末擢進士第與韋執誼厚因善王叔文再遷爲左拾

遺以侍御史副張薦使吐蕃會順宗立薦卒於虜虜以中國有喪畱溫不遣時叔文秉權與游者皆貴顯溫在絕域不得遷常自悲元和元年乃還而柳宗元等皆坐叔文貶溫獨免進戶部員外郎溫藻翰精富一時流輩推尙性險躁譎詭而好利與竇羣羊士諤相昵羣爲御史中丞薦溫知雜事士諤爲御史宰相李吉甫持之久不報溫等怨時吉甫爲宦侍所抑溫乘其間謀逐之會吉甫病夜召術士宿於第卽捕士掠訊且奏吉甫陰事憲宗駭異旣詰辯皆妄言將悉誅羣等吉甫苦救乃免

於是貶溫均州刺史士諤資州議者不厭再貶爲道州  
久之爲衡州治有善狀卒年四十

呂恭字敬叔渭次子貌奇偉有大志信善容物累遷殿中  
侍御史擢桂管都防禦副使卒柳子厚爲作墓銘

衛次公字從周河中河東人舉進士高第調渭南尉嚴震  
辟佐興元府累遷殿中侍御史貞元中擢左補闕翰林  
學士貞元末召至金鑾殿議所立次公曰冢嫡內外係  
心必不得已宜立廣陵王議乃定王叔文等用事多所  
持正知禮部貢舉斥華取實不爲權力侵撓由中書舍

人充史館修撰改兵部侍郎坐鄭綱罷下除太子賓客  
久乃爲陝虢州觀察使蠲橫租錢歲三百萬復入爲兵  
部侍郎李勣徐有功孫皆以負不得調召見曰子之祖  
勳在王府甯限常格乎卽優補而遣進尚書左丞時討  
蔡數建請罷兵上將相之制藁具而蔡捷書至乃以檢  
校工部尚書爲淮南節度使久之召還卒年六十六贈  
太子少傅諡曰敬次公本善琴京兆尹李齊運嘗使子  
請受琴法次公拒絕因終身不復鼓其節尚終始完潔  
子洙舉進士尚臨眞公主檢校祕書少監駙馬都尉文

宗曰洙起名家以文進宜諫官寵之乃爲左拾遺歷義成節度使咸通中卒

樊澤字安時河中人少孤依外家客河朔相衛節度使薛嵩表爲堯山令舉賢良方正次潼關雨淖困不能前有熊執易者同舍逆旅哀之輟所乘馬傾楮以濟自罷所舉是歲澤上第楊炎善之擢左補闕澤有武力喜兵法時謂有將帥器嘗召對延英德宗歎其論兵與我意合累遷山南東道司馬就拜節度使每射獵諸將憚其材武數與李希烈角禽驃將張嘉瑜杜文朝梁俊之等賊

永濟縣志

卷七

人物上

十五

氣沮縮遂取唐隋二州貞元三年爲荆南節度使會山南東道嗣曹王皋卒軍亂剽居人以澤威惠著襄漢間復徙山南東道加檢校尚書右僕射十四年卒年五十七贈司空諡曰成訃至帝爲撤宴廢朝

樊宗師字紹述始爲國子主簿元和三年擢軍謀宏遠科授著作佐郎歷金部郎中錦州刺史徙絳州治有績進諫議大夫未拜卒始宗師家饒於財悉散施姻舊賓客妻子告不給宗師笑不答然學力多通解著春秋傳魁紀公樊子凡百餘篇別集尚多韓愈稱宗師論議平正

有經據嘗薦其材云

馬存亮河中人爲左神策中尉敬宗時卜者蘇元明與染房供人張韶等作亂揮兵趣禁庭時上在清思殿擊毬宦者急走白上上狼狽欲幸右軍左右曰右軍遠恐遇盜不若幸左軍近上從之存亮聞上走出捧上足涕泣自負上入軍中遣大將康藝全入宮討賊上憂二太后隔絕存亮復以五百騎迎至軍藝全與右軍引兵合擊殺元明韶及其黨逮夜始定後推監淮南軍卒逮事德宗更歷六朝資性端謹唐世中人之賢者惟存亮與西

永濟縣志

卷七

人物上

十六

門李元嚴遵美三人而已祀鄉賢

胡證字啓中河中河東人舉進士第渾城美其材奏寘幕下由殿中侍御史爲韶州刺史以母老辭爲太子舍人更爲襄陽于頔掌書記入爲戶部郎中詔兼御史中丞爲魏博田宏正副使人遷諫議大夫元和九年以儒而勇選拜振武軍節度使道河中時趙宗儒爲帥以州民入謁里人榮之居四年召任金吾大將軍又充京西京北巡邊使太和公主降回鶻以檢校工部尚書爲和親使請儉受省費以絕私覲禮免鬻官之濫次漠南回鶻

欲屈脇之且言使者必易服又欲主便道疾驅證固不從以唐官儀自將訖不辱命還拜工部侍郎改京兆尹左散騎常侍寶曆初以戶部尚書判度支固辭拜嶺南節度使卒年七十一贈尚書右僕射

薛逢字陶臣蒲州人萬年尉崔鉉爲相引直宏文館歷仕御史有薦逢知制詔者爲當道所忌出爲巴州刺史有集行世祀鄉賢

趙臣字伯循河中人與陸淳啖助同解春秋爲時名儒後學宗之祀鄉賢

永濟縣志

卷七

人物上

十七

暢當河東人父璀左散騎常侍代宗時與裴冕賈至王延昌待制集賢院終戶部尚書當擢進士第貞元初爲太常博士昭德之喪詔太常議承華與諸王服制當與博士張薦柳冕李吉甫請如晉杜預議又貞觀十一年正月以晉王爲并州都督旣命官當已除矣今宜如魏晉制詔宰臣與有司更議當又言宜酌變爲制及董晉代鄭叔則爲太常卿上諭曰暢當等請循魏晉故事至論也當以果州刺史卒

敬晦河東人進士及第辟山南東道節度府與馬曙聯舍

曙廷責太史吏員兼軍職不引咎走訴諸府牙將十輩  
申吏枉晦讓諸將曰吏冒軍名公等不能詰反引與爲  
伍奈何眾愧謝闔府咨美累擢諫議大夫武宗時趙歸  
眞挾詐御史平吳湘獄得臯晦上疏極道非是不少回  
縱大中中歷御史中丞刑部侍郎諸道鹽鐵轉運使浙  
西觀察使歲連饑處身儉勤貲力遂充徙充海節度使  
以太子賓客分司卒贈兵部尚書諡曰肅

盧簡辭字子策父綸別傳與兄簡能弟宏正簡求皆有文  
並第進士歷佐帥府入遷侍御史習知法令及臺閣舊

事實歷中黎幹子熠詣臺請復葉縣故田有司莫能知  
簡辭獨詰曰按幹坐黨魚朝恩誅貲田皆没大歷後數  
十年比有赦令無原洗之言熠安得冒論不爲治福建  
鹽鐵院官盧昂坐贓簡辭窮按乃得金牀瑟瑟枕大如  
斗敬宗曰禁中無此昂爲吏可知矣李程鎮太原表爲  
節度判官入授考功員外郎累擢湖南浙西觀察使以  
檢校工部尚書爲忠武節度使徙山南東道坐事貶衢  
州刺史卒

盧宏正字子彊佐劉悟府累擢監察御史沈傳師表爲江

西團練副使入拜侍御史華州刺史宇文鼎戶部員外  
盧允中坐贓詔宏正按訊文宗將殺鼎宏正執據臯由  
允中鼎乃連坐不應死帝釋之累遷給事中會昌中詔  
河北三節度討劉稹何宏敬王元逵先取邢洛磁三州  
宰相李德裕畏諸帥有請地者乃以宏正爲三州團練  
觀察畱後制未下稹平卽詔爲三州及河北兩鎮宣慰  
使還拜工部侍郎以戶部領度支初兩池鹽法弊得費  
不相償宏正使判官司空輿檢鉤釐正條上新法卽表  
輿兩池使自是課入歲倍用度賴之踰年出爲武甯節

度使徐自王智興後吏卒驕沓銀刀軍尤不法宏正戮  
其尤無狀者終宏正治不敢譁優詔褒勞宏正羸病丐  
身還東都不許徙宣武卒於鎮贈尙書右僕射

盧簡求字子臧始從江西王仲舒幕府兩爲裴度元稹所  
辟又佐牛僧孺鎮襄陽入遷戶部員外郎會昌中討劉  
稹以忠武節度使李彥佐爲招討使又選簡求副之俾  
知後務歷蘇壽二州刺史大中九年党項擾邊拜涇原  
渭武節度使徙義武鳳翔河東三鎮簡求爲政長權變  
文不害居邊善綏御人皆安之太原統退渾契苾沙陀

三部難馴制它帥或與詛盟質子弟然寇掠不爲止簡求歸所質開示至誠虜憚其恩信不敢亂久之辭疾以太子少師致仕還東都治園沼林芴與賓客置酒自娛卒年七十六贈尚書左僕射

王重榮太原祁人父縱大和末爲河中騎將因家焉重榮以父任爲列校與兄重盈皆以毅武冠軍擢河中牙將主呵察時兩軍士干夜禁捕而鞭之士還訴於中尉楊元實元實怒執重榮讓曰天子爪士而藩校辱之答曰夜半執者姦盜孰知天子爪士具言其狀元實歎曰非

爾明辨孰由知之更諉於府擢右署重榮多權詭眾所嚴憚雖主帥莫不下之稍遷行軍司馬黃巢陷長安分兵略蒲節度使李都不能支乃臣賊然內憚重榮表以自副地邇京師賊調取橫數使者至百輩坐傳舍益發兵吏不堪命重榮脇說都曰我所詭謀紓難以外援未至今賊哀責日急又收吾兵以困我則亡無日矣請絕橋嬰城自守不然變生何以制之都曰吾兵寡謀不足絕之禍且至願以節假公遂奔行在重榮乃悉驅出賊使斬之因大掠居人以悅其下天子使前京兆尹竇滂

間道憫其軍因詔代都重榮率官屬奉迎瀆至大饗士  
昌言曰天子以大臣守土誰得逐之爲我疏首惡者眾  
莫敢對重榮佩刀厯階曰首謀者我也尙誰索瀆卽奔  
還重榮遂主畱後賊使健將朱溫以舟師下馮翊黃鄴  
率眾自華陰合攻重榮重榮感勵士眾大戰敗之賊棄  
糧仗四十餘艘卽拜檢校工部尙書爲節度使會忠武  
監軍楊復光率陳蔡兵萬人屯武功重榮與連和擊賊  
將李詳於華州執以徇賊使尙讓來攻而朱溫將勁兵  
居前敗重榮兵於西關門於是出兵夏陽掠河中漕米

數十船重榮選兵三萬攻溫溫懼悉鑿舟沈於河遂舉  
同州降復光欲斬之重榮曰今招賊一切釋罪且溫武  
銳可用殺之不祥表爲同華節度使有詔卽副河中行  
營招討賜名全忠巢喪二州怒甚自將精兵數萬壁梁  
田重榮軍華陰復光軍渭北犄角攻之賊大敗執其將  
趙璋巢中流矢走重榮兵亦死耗相當懼巢復振憂之  
與復光計復光曰我世與李克用共憂患其人忠不顧  
難死義如已若乞師焉事蔑不濟乃遣使者約連和克  
用使陳景思總兵自嵐石赴河中親率師從之遂平巢

復京師以功檢校太尉同中書門下平章事封瑯琊郡王累加檢校太傅中人田令孜怒重榮據鹽池之饒於時巨盜甫定國用大乏諸軍無所仰而令孜爲神策軍使建請二池領屬鹽鐵佐軍食重榮不許奏言故事歲輸鹽三千乘於有司則斥所餘以贍軍天子遣使者諭旨不聽令孜徙重榮充海節度使以王處存代之詔克用將兵援河中重榮上書劾令孜離間方鎮令孜遣邠甯朱玫進討壁沙苑重榮詒克用書且言奉密詔須公到使我圖公此令孜朱全忠朱玫之惑上也因示僞詔

克用方與全忠有隙信之請討全忠及玫帝數詔和解克用合河中兵戰沙苑玫大敗奔邠州神策軍潰還京師遂大掠克用乘勝西天子走鳳翔俄嗣襄王煝僭位重榮不受命與克用謀定王室楊復恭代令孜領神策故與克用善遣諫議大夫劉崇望齎詔諭天子意兩人聽命卽獻縑十萬願討孜自贖崇望還羣臣皆賀重榮遂斬煝長安復平

五代

盧文紀字子持祖簡求唐太原節度使父嗣業右補闕文

紀舉進士事梁爲刑部侍郎集賢殿學士唐明宗時爲御史中丞初上事諸道進奏官賀文紀據牀端笏臺史通名贊拜請悉復中外官校考法將相天子自書之詔雖施行而官卒不考遷工部尙書貶石州司馬久之爲秘書監太常卿奉使於蜀過鳳翔時廢帝爲鳳翔節度使文紀爲人形貌魁偉語音琅然廢帝奇之後入立欲擇宰相左右皆言文紀及姚顛有人望廢帝因悉書清望官姓名內琉璃瓶中夜焚香祝天以筋挾之首得文紀欣然相之拜中書侍郎同中書門下平章請罷五日

起居復唐故事開延英冀得從容奏議天下事因詔宰相有事不以時詣闕門請對及北征至河陽勸帝扼橋自守不聽晉初罷爲吏部尙書累遷太子太保致仕周初拜司空於家卒年七十六贈司徒

宋

袁彥河中河東人少以趨勇隸奉國營漢乾祐中周祖討李守貞置麾下及鎮鄴爲部直小將周廣順中世宗在澶淵遷親事都校改開封府步直指揮使顯德初授內外步軍都軍頭泉州刺史尋改岳州防禦使從征壽州

爲城北造竹龍都部署載甲士數百攻其城又修渦口  
橋成世宗幸焉因立鎮淮軍命彥爲武信軍節度權侍  
衛步軍都指揮使又爲淮南道行軍馬步軍副都指揮  
使賜衣服金帶鞍勒馬鎧甲器仗太祖下滁陽擒皇甫  
暉姚鳳彥皆有勞詔褒之又令屯下蔡以逼壽春從攻  
濠泗擒南唐將許文績邊鎬等師還授步軍都指揮使  
領彰信軍節度六年春命發近畿丁壯浚五丈河恭帝  
時命移保義軍宋初加檢校太尉來朝改鎮曹州乾德  
六年移靜難軍開保二年移鄆州五年罷鎮歸卒年六

永濟縣志

卷七

人物上

二十四

十六景德四年特錄其孫昭慶爲借職大中祥符八年  
特遷殿直卒

裴濟字仲溥絳州聞喜人唐相耀卿八世孫徙河中少事  
晉邸糾同輩過失被譖出補太康鎮將譖者尋坐法太  
宗知濟可任補殿直爲天威軍兵馬監押又令監軍易  
州遼攻城不能下遷西頭供奉官太平興國末江表盜  
起命爲巡檢遷崇儀副使召還遷使監戍兵於威虜軍  
次鎮州賊騎夜扣城門大呼曰官軍至矣州將促開關  
濟遽止之曰此必妄也及旦果有敵兵遯去上嘉之遷

西上閤門使定州都監就加行營鈐轄尋知定州契丹  
三萬騎來攻逆擊於徐河斬數千級獲牛馬鎧仗甚眾  
涪化初判四方館尋爲鎮州行營鈐轄又與李繼隆擊  
賊於唐河濟短兵陷陣賊大敗走優詔褒美初繼隆以  
濟性剛不悅之及是恨相知之晚改四方館使知定州  
徙天雄軍鈐轄遷客省使復知定州至道二年改內客  
省使知鎮州立春出土牛卒挾牛去濟亟命擒之果有  
竊發者數十人已劫酈間矣悉蒐捕腰斬之軍民肅然  
濟在鎮定十五年威績甚著召還知天雄軍咸平初領

永濟縣志

卷七

人物上

二十五

順州團練使知靈州兼都部署謀緝八鎮興屯田民甚  
賴之三年清遠軍陷夏人斷饜道絕援軍濟刺指血染  
奏求救甚急兵不至城陷死之

薛田字希稷河中河東人少師种放與魏野善第進士起  
家丹州推官李允正辟延州從事向敏中薦其材改著  
作佐郎知中江縣父喪會祀汾陰經度制置使陳堯叟  
奏起通判陝州還拜監察御史母憂會祀太清宮丁謂  
奏起通判亳州遷殿中侍御史權三司度支判官改侍  
御史益州路轉運使民間以鐵錢重私爲券以便交易

謂之交子富家專其事數至爭訟田請置交子務以權  
出入後寇瑊用其議蜀人便之就除陝西轉運使進直  
昭文館知河南府復入爲度支副使使遼還擢龍圖閣  
待制知天雄軍尋擢知開封府以樞密直學士知益州  
還爲左司郎中知審刑院羌人內寇遷右諫議大夫知  
延州以疾徙同州又徙永興軍不行卒田性和厚以幹  
敏數爲大臣所稱云

柳開字仲塗河中人家法甚嚴父承翰仕周爲監察御史  
開幼有器局屬文法韓退之嘗飲酒肆與一書生接坐

永濟縣志

卷七

人物上

二十六

語知其貧不能葬父母將千求知己開問所費幾何曰  
得錢二十萬足矣開曰子姑就舍吾爲子謀傾囊得百  
金錢數萬盡以遺之仕爲代州守修城壘戰具以禦寇  
號補士先生祀鄉賢

侯仲良字師聖河東縣人父道濟娶程珣女仲良呼二程  
爲舅從之游未悟來訪濂溪畱之對榻夜談越三日自  
謂有得如見天之廣大伊川亦訝其不凡曰得非從濂  
溪來耶人有欲館仲良者見其家多佛書佛像卽去之  
朱子稱其學清白勁正祀鄉賢

穆衍字昌叔河中人第進士調華池令民牛爲讐家斷舌  
訟於縣衍命殺之明日讐以私殺告衍曰斷牛舌者乃  
汝耶訊之具服後知涇化從韓絳宣撫陝西遇慶卒漬  
衍念母在耀亟謁歸信宿走七驛北至慶卒知行名不  
敢近時捕賊兵擅發常平倉衍曰饑之不恤則吾兵將  
爲慶卒矣衍考課爲一路最元豐中參种諤軍事諤第  
賞以死事爲下衍曰此非所以勸忠也力爭之諤還入  
塞詔往靈武援渭慶兩軍衍曰吾兵未及解甲安能犯  
不測諤乃止同幕畏罪陽謝之衍識其意曰全萬眾之

命以一身塞責衍無憾焉元祐初議棄熙蘭衍言蘭棄  
則熙危熙棄則關中震唐自失河湟警及長安至今二  
百餘年非神考英武孰能克復若一旦委之恐後患益  
前悔將無及矣議遂止改陝西轉運判官金部戶部員  
外郎詔視熙河還言質孤勝如據兩川美田實彼我必  
爭之地自西關失利遂廢不守請界二壘之間城李諾  
坪以控要害及他城堡皆起亭障以通涇原明年遂城  
李諾名曰定遠三遷左司郎中紹聖初以直秘閣爲陝  
西轉運使加直龍圖閣知慶州徙延安又徙秦州未行

卒年六十三敕河中官庀其葬後追錄蘭州議官其一子

金

強伸本河中射糧軍子弟貌寢陋而膂力過人興定初從華州副都統安甯復潼關有勞監郃陽醋後客洛下選充官軍戍陝鐵嶺軍潰被執從都尉烏林答胡土竄歸中京畱守撒合輦死元帥左監軍任守真復立府事以便宜署伸警巡使守真又死鄭州天興元年八月中京人推伸爲府簽事領軍二千五百人傷殘老幼半之甫

永濟縣志

卷七

人物上

二十八

三日復被圍東西北三面多樹大炮伸括衣帛爲幟立之城上募壯士得五千人赤身而戰往來救應大叫以愍子軍爲號其聲勢與萬眾無異刮錢爲鏃得元兵一箭截而爲四以筒鞭發之創遏敵砲能發大石於百步外所擊無不中伸奔走四應所至必捷得二駝及所乘馬皆殺之以犒軍士得一鬻如賜百金九月元兵退百里外閏月復攻一月兵倍前不能拔事聞哀宗降詔褒諭以伸爲中京畱守元帥左都監世襲謀克行元帥府事二年二月建堂於洛川驛之東名曰報恩刻詔文於

石誓世以死効三月中使至以伸便宜從事時行省思  
烈卒胡土代伸行總帥府事月餘糧盡軍民稍稍散去  
五月元兵復來陣於洛南伸陣水北有韓帥者匹馬立  
水濱招伸降伸責曰君獨非我家臣子耶旣不能勤王  
乃欲誘我降耶我本一軍卒今貴爲畱守誓以死報國  
遂躍而射之帥奔陣率步卒數百奪橋伸軍一旗手獨  
出拒之殺數人卽手解都統銀符佩之士氣復振初築  
戰壘於城外四隅至五門內外皆有屏謂之迷魂牆元  
兵以五百騎迫之伸率部下二百鼓躁而出元兵退六

月胡土走鷹揚都尉獻西門以降伸知城不能守率死  
士數十人突東門出轉戰至偃師力盡就執載以一馬  
擁迫而行宛轉不肯進強掖之及中京七里河將見大  
帥塔察語益激兵卒曰此人乖角如此其能降乎不如  
殺之因好語誘曰汝能北面一屈膝吾貸汝命伸不從  
左右力持使北伸拗頭南向遂殺之

王庭筠字子端河東人生末期視書識十七字七歲學詩  
稍長涿郡王脩一見期以國士登大定十六年進士第  
調恩州軍事判官臨政卽有聲郡民鄒四者謀爲不軌

事覺逮捕千餘人而鄒四竄匿不能得朝廷遣大理司直王仲軻治其獄庭筠以計獲鄒四分別註誤坐預謀者十二人而已再調館陶主簿卜居彰德買田隆慮讀書黃華山寺因以自號是年十二月上因語及學士歎其乏材參政守貞曰王庭筠其人也三年詔爲應奉翰林文字命與祕書郎張汝方品第法書名畫遂分入品者爲五百五十卷五年八月上顧謂宰執曰應奉王庭筠朕欲以詔誥委之其人才亦豈易得近党懷英作長白山冊文殊不工遂遷庭筠爲翰林修撰承安元年正

月坐趙秉文上書事削一官二年降授鄭州防禦判官四年起爲應奉翰林文字泰和元年復爲翰林修撰扈從秋山應制賦詩三十餘首上甚嘉之明年卒年四十四有七上素知其貧詔有司賻錢八十萬以給喪事求生平詩文藏之秘閣又以御製詩賜其家其引云王遵古朕之故人也乃子庭筠又以才選直禁林者首尾十年今茲云亾玉堂東觀無復斯人矣

田世英字用之河中人博學能文尤長於詩調絳州教授遷虞鄉簿及尹後退居教授鄉里從游者甚眾稱爲田

先生有墓銘祀鄉賢

李獻甫字欽用獻能從弟也博通書傳尤精左氏及地理學爲人有幹局心所到則絕人遠甚故時人稱其精神滿腹興定五年登進士第歷咸陽簿辟行臺令史正大初夏使來請和朝廷以翰林待制馮延登往議時獻甫爲書表官從行夏使有口辯延登不能折往復數日不定至以歲幣爲言獻甫不能平從旁進曰夏國與我好百年今雖易君臣之名爲兄弟之國使兄輸幣甯有據耶使者曰兄弟且不論宋歲輸吾國幣二十五萬疋

典故具在君獨不知耶金朝必欲修舊好非此例不可獻甫作色曰使者尚忍言耶宋以歲幣餌君家而賜之姓岸然以君父自居夏國君臣無一悟者誠謂使者當以爲諱乃今公言之使者果能主此議以從賜姓之例敝邑雖歲捐五十萬獻甫請以身任之夏使語塞和議乃定後朝廷錄其功授慶陽總帥府經歷官尋辟長安令京兆行臺所在供億甚繁獻甫處之常若有餘縣民賴之以安入爲尚書省令史天興元年行充六部員外郎守備之策時相倚任之以功遷鎮南軍節度副使兼

右警巡使死於蔡州之難年四十所著文章號天倪集  
留汴京獻甫死其家亦破同年華陰王元禮購得之傳  
於世

段元亨風陵鄉人提孤軍守河中或誘其降不從城陷緬  
西南堞下死於河兄大亨爲領軍都元帥亦死於難祀  
鄉賢

元

王恩河中人狀貌魁偉知識明達勇力過人金末避亂鄜  
州元兵南下率眾投元四太子麾下遂命總歸附之眾

永濟縣志

卷七

人物上

三十二

凡遇攻戰屢有奇功授都元帥年九十三而終祀鄉賢  
裴居敬蒲州人中統至元間爲宿衛兼王府掾王知其賢  
加以禮遇隨王府視師北邊有勦禿魯功厯官陝西行  
臺侍御史至參政卒居敬常官於蜀蜀宣慰使扎法者  
其祖故爲蜀平章行省居敬謂扎法曰先平章惠愛及  
於土人人是以思之不念今本道歲遣收其賦者苛取  
無藝爭逃林谷因而抗拒則征殺之與先平章政何異  
耶扎法曰同僚未常言及此公以相教某之福也遂召  
諸土官諭以德意各使自占歲入如期一方甯謐四川

運司連敗數任同官爭爲奸利居敬力革其弊守成法  
朝廷以所入有羨運司官悉加賞擢眾喜曰非裴公安  
得此乎雲南職兵民者以梁王在鎮恃勢朋恣貪墨憲  
司繩之輒矯詔赦免及居敬至直前啟梁王王聽信之  
自是其屬一守典制無敢肆者居敬好書能詩文有集  
十卷藏其家

何約蒲州人起家以儒試吏累辟中書掾除吏部主事歷  
內臺侍御史出官河南會利州饑蘭陽大水倡議發粟  
拯救活者數十萬計持節諸道嚴而不苛泰定天厯間

典京漕運餉及千萬石捍衛有方軍食不乏文宗賜上  
尊以旌其勞及遷他官上見其名曰是爲京漕能足吾  
兵食者擢參西京行省時月魯帖木兒授本省平章以  
才不及辭上曰有何參政在卿何過慮乎及執憲西臺  
多所糾劾然爲用事大臣所訾欲中傷之賴約無所失  
得免初約父娶李氏卒繼娶李氏有婦德約兄弟五人  
並仕官方州爭迎李氏就養李氏母吳九十餘無子李  
不忍遠去曰若曹欲養母我獨不欲養母乎有知約者  
將用爲山西廉訪使使得近便於供養會御史大夫缺

人乃仍留約進封河東郡公數年乞歸卒歐陽元功志  
其墓

